



ՌՈՒՄԻՆԻԱՅԻ ԵՎ ԲՈՒԼՂԱՐԻԱՅԻ ՀԱՅՈՑ ԹԵՄԵՐԻ ԱՌԱՋՆՈՐԴ
Տ. ՏԻՐԱՅՐ ԵՊՍ. ՄԱՐՏԻԿՅԱՆԸ ՄԱՅՐ ԱՌՈՌՈՒՄ

Վեհափառ Հայրապետի հրավերով նոյեմբերի 1-ին, ուրբաթ օրը, ուխտավորաբար Մայր Աթոռ է ժամանում Ռումինիայի և Բուլղարիայի հայոց թեմերի առաջնորդ տ. Տիրայր եպս. Մարտիկյանը՝ մասնակցելու համար համայն Աֆրիկայի և Ալեքսանդրիայի Տ. Նիկողոսոս Զ հունաց Արքազան Պատրիարքի՝ Մայր Աթոռ այցելության առթիվ՝ նոյեմբերի 19—26 օրերին կազմակերպվելիք հանդիսություններին:

Մայր Աթոռում գտնված օրերին տ. Տիրայր արքազանը ուխտագնացություններ է կատարում, պատարագում և քարոզում մի շարք եկեղեցիներում:

Նոյեմբերի 15—16 օրերին տ. Տիրայր եպիսկոպոսը, Ծիրակի թեմի առաջնորդ տ. Նարեկ եպիսկոպոսի հրավերով, այցելում է Ծիրակի պատմական հուշարձանները, այդ թվում՝ Հատիճայի, Մարմաշենի, Սանահնի և Հաղբառի վանքերը:

Դեկտեմբերի 1-ին, կիրակի օրը, Արարատյան թեմի առաջնորդական փոխանորդ տ. Կոմիտաս արքեպ. Տեր-Ստեփանյանի հրավերով, տ. Տիրայր եպիսկոպոսը Երևանի և Հովհաննես եկեղեցում պատարագում է և Բանին կենաց քարոզությամբ մխիթարում հավատացյալներին:

Տ. Տիրայր արքազանը հայ եկեղեցու երիտասարդ ու խոստումնալից իշխանավորներից մեկն է: Նա 14 տարի ձեռնհասորեն ղեկավարում է Ռումինիայի և Բուլղարիայի հայոց միացյալ թեմերը՝ արտեռանդն մասնակցությամբ և համերաշխ գործակցությամբ վերոհիշյալ համայնքների պատվարժան թեմական իշխանություններին:

Տ. Տիրայր արքազանն իր առաջնորդության տարիներին բարեկամական, սիրալիր հարաբերություններ է պահել և պահում է Էկումենիկ ոգով Ռումինիայի և Բուլղարիայի օրթոդոքս քույր եկեղեցիների հոգևոր պետերի, հոգևորականության, ինչպես նաև օրինական, գործնական ու քարոշական գետնի վրա լավ հարաբերություններ՝ տեղի պետական իշխանությունների հետ:

Այս տարի, մարտին, տ. Տիրայր սրբազանը Ռումինիայի Արևելագետների միության հատուկ ժողովում միաձայնությամբ ընտրվել է վերոհիշյալ միության անդամ:

Մայիսին տ. Տիրայր եպիսկոպոսը, որպես թեմակալ առաջնորդ, մասնակցել է Բուխարեստում Պետական պալատի Սոցիալիստական Միասնության ճակատի անդրանիկ համագումարին՝ ընկերակցությամբ Ռումինիայի հայոց թեմական խորհրդի ատենապետ դոկտ. Գրիգոր Բամբուկճյանի և Բուխարեստի հայոց հոգևոր հովիվ տ. Զարեհ ծ. վրդ. Պարոնյանի:

Սոցիալիստական Միասնության ճակատի համագումարը, ի շարս Բուխարեստի այլ հոգևոր պետերի, տ. Տիրայր եպս. Մարտիկյանին միաձայնությամբ ընտրում է Սոցիալիստական Միասնության ճակատի Գերագույն Ազգային խորհրդի անդամ:

Օգոստոսին, Ռումինիայի ազատագրության 30-ամյակի կապակցությամբ, Ռումինիայի հայոց առաջնորդ տ. Տիրայր եպս. Մարտիկյանը պարգևատրվում է «Ռումինիայի հանրապետության աստղ» շքանշանի 3-րդ աստիճանով, Սոցիալիստական Միասնության ճակատի Գերագույն Ազգային խորհրդի նախագահ Զառչեսկուի վկայականով և 30-ամյակի մեդալով:

Դեկտեմբերի 3-ին, երեքշաբթի օրը, տ. Տիրայր եպիսկոպոս Մարտիկյանը, հրաժեշտ տալով Վեհափառ Հայրապետին և Մայր Աթոռին, մեկնում է իր թեմ՝ Բուխարեստ:

